

嘆鳳傷麟集



MG
I226
213




3 1774 4083 5

先室朱孺人遺像



楊嫂朱孺人像贊
於穆夫人系出紫陽于歸宏
農令譽孔彰主持家政辛苦
備嘗鉛華勿飾荆釵布裳鬢
眉減色巾幘增光方歌偕老
伉儷情長亡何蟾滿吹破風
狂安仁心悼奉倩神傷猗歟
懿行珩璫瓊璫遺容宛在彤
管流芳

侍生楊遵路拜撰



悼先室朱孺人集龔句

亦狂亦俠亦溫文臣朔家原有細君憐我平生無好計商量出處到紅裙
好夢如雲不目由羽璫詞筆自今收無妻怕學林逋獨更折梅花寄暮愁
我自低迷思錦瑟一釵一佩斷知聞捫心半夜清無寐此是平生未報恩
整頓全神注定卿莫拋心力貿才名一家倘許圓鷗夢兜率甘遲十劫生
忽向東山感歲華自緘紅淚請迴車天花豈用鈴旛護化作春泥更護花
那向如花辨得明詞鋒落月互縱橫米鹽種種家常話肯向渠儂側耳聽
樸學奇材張一軍胸中靈氣欲成雲迢迢望氣中原夜窈窕秋星或是君
雙負簫心與劍名天風鸞鶴怨三生勞人只有空王諒萬一天填恨海平
文字緣同骨肉深小屏紅燭話冬心著書不爲丹鉛誤累汝千回帶淚吟
迴腸蕩氣感精靈歷劫丹砂道未成綰就同心堅俟汝更何方法遣今生

丹徒楊鴻年秋心稿

歎鳳傷麟集序

旅居岑寂憂從中來忽老友楊君秋心以歎鳳傷麟集見示讀竟
作而言曰昌黎所謂愁苦易好懽愉難工者其信然與秋心豐才
晉遇年逾強仕仍鬱鬱不得志且遺挂傷心每抱空帷之戚其元
聘朱嘯雲女士備德容善吟詠未于婦而歿秋心哀之繪湘雲出
岫圖以寄慨旋娶朱杏仙女士亦賢而才者也曾繪探花杏苑圖
自作徵詩啓駢四儷六摘豔熏香而字裏行間復不忘當年故劍
余嘗三復其文竊歎秋心性情之摯伉儷之敦方祝其魚水常諧
可以追蹤於梁孟不謂天之阨秋心者未有已也三索得男而曇
花一現不久悉皆化去秋心得而復失一而再再而三蓋其痛心
可知矣余疊誦殤曇錄殤曇續錄殤曇補錄諸刊一字一派情見
乎詞殊令人不堪卒讀也杏仙女士頻年哭兒積思成癉女子善

懷尤爲悲痛病魔肆虐骨立形銷日復一日竟以不起嗚呼何昊天不弔旣奪其子復奪其妻使秋心潘岳悼亡卜商哭子竟以一身兼之宜其有歎鳳傷麟之作也人生不幸遭此慘境其有不搔首問天拔劍斫地者乎若余也一生境遇與秋心間有異同秋心兩賦悼亡余亦兩賦悼亡秋心三喪其子余則喪一子兩女秋心有湘雲出岫探花杏苑等圖徵題余亦有僊樓尋夢傷春病酒等圖徵題所異者秋心萱草長榮由耄耋而至期頤家慶正未有艾而余於舊秋返歛痛遭先慈之喪定省久疏未報春暉於萬一清夜自思罪無可逭况秋心斷絃以後猶有紅袖添香將星替月旁生甘蔗自在意中上承菽水之歡下得團欒之樂遠勝余面壁十年鰥居終老以此喻彼判若天淵願我秋心勿作悲觀善自排遣須知剝久復至否極泰來始雖失之東隅終有收諸桑榆之日也

又何傷歎之足云

民國十八年己巳清和下浣北野汪定執允中撰

題歎鳳傷麟集

歙縣方詒璋冠洲

瑤池駕去不歸來月冷風淒夢乍回
熨體當時留寶枕畫眉無處覓
妝台憐他天上祥麟種愁煞人間老鳳才
寂寞孤幃增悵惘相思紅豆鬱難開

又調寄浣溪紗

吳縣王周雲槎

回憶桃花滿樹春不堪人面葬沙塵
憑欄空自黯傷神鳳去西池憐幻相
麟歸南嶽證前因新詞流播篤天倫

歎鳳傷麟集

敬輓朱孺人仙逝

丹陽張嘉澍潤民

憐卿絕世好丰姿，恩義方深忽別離。
兩個鴛鴦分翼日，五更風雨斷腸時。
枝頭不見花如面，天上惟懸月似眉。
聽盡漏聲纔得寐，夢中歡會醒來悲。

更深欲臥怯空幃，一觸情懷淚暗揮。
上苑名花易凋謝，茂林小鳥忽分飛。
枕邊好夢驚難續，月下芳魂去不歸。
昔日衣裳皆覺近，來真個減腰圍。

紅塵纔謫卅餘年，又見嫦娥返九天。
從此閨中明月夜，可憐后羿泣孤眠。

腰圍尺二減難量，花落春歸欲斷腸。
自古紅顏皆薄福，須知續命本無湯。

美人今古總堪嗟，大抵才多數必奇。
我欲搔頭向天問，玉皇底事

妬蛾眉

一株梅植傍檐牙時到春深便落花不怪逋翁長太惜玉人仙去
不還家

挑燈繼晷性非慵刺繡無雙擅女工今過迴廊怕回首碧窗猶見
舊絨紅

嘉賓詰日到門來楚楚衣冠亦美哉呼婢留心烹飪事香廚惜少
作羹才

又

江陰王栖霞

寫出淒涼幼婦詞何堪紅葉再題詩此生已作分飛鳥來世應成
連理枝
興豪常把鞋盃舉情至每將詩卷攜一樣風流高格調輸他鶴子
與梅妻

天涯空覓合歡鞋地上難尋折股釵此別竟成千古恨將來但願一山埋

惟憐梧樹栖難定深鎖眉峯鬱不開同是天涯淪落者傷心最怕上蘇台

哭婦君偏多恨事喪妻我亦黯傷神天公本是無情者忍使男兒志不伸

不爲天上雙飛鳳空簾箱中連理裙豈有癡郎忘淑女忍將鶴煑與琴焚

世上佳人何足惜心頭恨事本難言落花流水皆無迹秋月春風莫再論

君似江郎能握筆我爲龔子欲憑棺眼中淚與心頭血更比青梅一倍酸

丁卯三月十二日爲先室朱孺人周忌聊賦四章以當一哭

丹徒楊鴻年 秋心

阿儂也是一鰥魚半載孤眠恨有餘斑管空題七言句黃泉難覓
八行書柳隄去歲曾飛絮茅草當年連拔茹又到營齋營奠日尙
希仙女駕雲車

于今不見步珊珊累我揮毫琢肺肝總望百年共甘苦誰知一旦
獨飢寒好花早已飛金谷明月依然似玉盤新穀旣升舊穀沒回
思往事欲心酸

不是吟詩嘔血腥如何對鏡竟忘形眼前忍見梅花落鼻內難聞
挂子馨愧我空過四十歲憐卿未到卅三齡今朝雖有樊姬伴但
愿他年添一丁

悼亡本說是虛文納寵分明負細君薄倖休持羅襪泣無情枉把

紙錢焚昔年已獲牛眠地今歲將營馬鬣塋握筆吟成詩四首不妨聊以寫云云

戊辰三月十二日爲先室朱孺人第二年周忌仍用去年元韻

丹徒楊鴻年秋心

桃樹開花食鰕魚今年逢閏惜春餘東皇多聽鶻歌曲西子仍無鯉寄書兩載未曾看杏靨一朝真個拔茅茹傷心怕到金閨路不見伊人油壁車

癡郎形態衆人姍祇爲吟詩琢肺肝恨我途窮逢日暮憐伊袖薄遇天寒嬌嬈應貯黃金屋芍藥原如白玉盤詎料百花易墮地每過三月欲心酸

營齋也要薦葷腥料得芳卿鑒物形苜蓿滿盤真可愧椒漿一盞本來馨杏因太豔難生子仙爲無緣不與齡去歲弄珠何足喜他

年總望再添丁

每看織錦與回文此日依然念細君死後衣裳猶未燬憤時筆硯
欲全焚孫郎有感方除服蘇氏無錢怎建坟可笑良人是貧士惟
知子曰及詩云

和作

武進諸懿德 秉彝

伉儷原如比目魚當時曾伴讀三餘治家勞母拊膺嘆得句瞞人
和淚書夢冷鴛鴦腸欲斷言防鸚鵡口仍茹香魂應向楓林去長
向雲端望綵車

淩波仙子步珊珊雪作飢膚鐵作肝萱茂爭榮欣晝永竹修徙倚
怯天寒功名空憶芙蓉鏡淡泊曾甘苜蓿盤相約春糧吳下住孟
光早死欲心酸

神州蕩滌氣羶腥方冀花開並蒂形堂北竹搖窗弄影澗南蘋采

袖餘馨釵分忽戢靈鷲翼酒進難延壽鶴齡淒絕鴛幃涼月上燈
前依舊嘆零丁

仲子生來手有文何妨遠嫁魯邦君慕才應把沉香刻憤世拚將
古硯焚愁覩潘郎改春鬢淒聽鮑妹唱秋墳蕪詞撫拾聊相慰未
免人云我亦云

又

吳縣王懷霖董庶

八章大著附雙魚正是三春風景餘酸鼻兩人無限恨斷腸一卷
悼亡書兒拋伯道君還壯文籀子雲吾本茹丰采未親情慄接得
閒走訪駕柴車
儒服拘攣供笑姍文通筆褪浪鐫肝鵬搏羨子青雲得蠖屈嗟余
白髮寒葦竇龍鍾扶竹杖畫樓燕寢獻椒盤春歸會有芝蘭茁不
比衰齡骨相酸

又

奉賢朱家駒 遜叟

秋風一紙遞雙魚，悽絕營齋洒淚餘。
兩載紅閨傷破鏡，九霄青鳥絕通書。
生前倩影嬌相倚，死後佳看美豈茹。
陌上春光猶自好，塵封射雉舊時車。

傷心莫憶步珊珊，不食應須擬馬肝。
草自忘憂娛日永，花偏賣恨怯春寒。
招魂兀倚三生石，承露還滋百尺盤。
綠葉成陰多結子，故應忍俊望梅酸。

先室朱孺人又居三週遂賦兩律

丹徒楊鴻年 秋心

杏已飄零人已仙，千秋萬古恨綿綿。
憐卿久別紅塵世，愧我難窮碧落天。
尚有桐棺思入土，聊陳麥飯算開筵。
鳳儔拆散麟兒死，可嘆孤身近暮年。

阿儂真悔戴儒冠，却似當年范叔寒。
席上菜羹卿莫笑，盤中苜蓿

我能餐紙錢一串聊周急醴酒三盃不合歡豈獨愁人多恨事花
難長好月難團

和作

丹陽荆鳳岡石梧

癡郎難會夢中仙花已飄茵柳已綿精衛魂歸墳碧落姮娥心死
託青天東風桃杏空羅綺寒食棠梨薦几筵伉儷猶虛聊以報祇
教樊素伴中年

下堂不整悵珠冠病裏猶思視燠寒萬樹梨花驚入夢一盃麥飯
勸加餐白楊還待來春補紅豆應追往日歡只盼關西瓜瓞茂濃
陰結子綠成團

又

奉賢朱聲韶伯庸

吟肩高聳作詩仙料峭春寒未脫綿路遠長房難縮地時艱杞土
尙憂天悼亡漫洒今朝淚營奠還如舊日筵好向藍田多種玉瑤

徽錦瑟正華年

又

吳縣顧寶書森卿

漫云成佛與昇仙齋奠雖虛力盡綿久別音容縈寤寐欲通消息
隔人天花悲落後還鋤種酒正歡時感散筵幸有朝雲伴坡老膝
前嬌女慰華年
蘭闥檢點到衣冠氣候關心問煥寒忍覩鴛針留刺繡難忘鴻案
勸加餐曲中永抱離鸞恨夢裏追思挽鹿歡我有山妻衰且病憐
他禮佛禱蒲團

又

烏程吳朝棟笏丞

只羨鴛鴦不羨仙此生無福恨綿綿莊休曠達由知命荀粲情懷
欲問天感逝何從尋故劍營齋枉自設華筵悼亡我亦悲同調屈
指而今已八年

閒居本不慕彈冠嚙臂其如盟竟寒幸有蘭芽能解語聊憑桃葉
勸加餐客中詩酒尋幽興夢裏釵鈿拾墜歡凋盡鬢絲人漸老推
窗怕見月團團

又

武進諸懿德秉彝

雪作肌膚姑射仙愛而不見意纏綿已隨妃子埋香土難倩媧皇
補恨天一曲愁聞單鵠操兩楹仍奠隻鷄筵糟糠義重多情堦霜
露愴懷年復年

依然博帶戴峨冠獨矢貞心保歲寒縱說束身能自好還期努力
勸加餐海東備感桑滄變堂北猶承菽水歡難得故人求故劍清
思泉湧比花團

秋心葬其夫人于白馬澗賦詩誌感率成五言一章以寓慰
忱

奉賢朱家駒題

地名白馬澗中妥彩鸞魂鬱鬱佳城樹灣灣活水源梅花長得氣
椒奠永無諼同穴百年後正昌駟馬門

和遜叟賜詩韻

丹徒楊鴻年 秋心

又到成垆日癡郎欲斷魂眠牛原有地飲馬豈無源三載長相別
千秋永不諼他年如化鶴便可返吳門

題憶雲望杏錄

南匯朱惟恭 太忙

分飛勞燕望迢迢福薄難教烽火銷好事消磨香骨碎佳期斷絕
玉顏凋詩箋斑駁湘妃血墨跡迷離楚客謠禍福生于悲喜境雲
蹤縹渺杏花嬌

一編悵觸感幽衷李代桃僵猶足雄昔日美人夢已醒此時佳耦
句能通難營金屋書無益幸獲藍田命未窮愧我當年吟雅恨于
今深祕竹箱中

又

憶雲悲起嘯望杏眷攜仙夢落巫山外春依小宋邊三生契琴瑟
一卷訊人天佳話應傳遍金閨虎阜前

又

伉儷皆前定梨雲杏雨天綺情兼綺夢多恨更多緣豔福詩酬唱
幽懷月缺圓撫今思昔感惆悵浩無邊

又

憶雲望杏黯魂銷離合悲歡綺思焦憶語淒涼秋館寂可憐心血
已全消

題湘雲出岫圖

吳縣張炳翔叔鵬

自恨當時未結褵吟詩泣別在臨歧明知鏡破終難合詩卷先題
閣倡隨

愿與癡郎共死生可憐事跡未分明身臨大節心難變不愧芳名字慕貞

彩雲易散本難歸出岫風吹縹渺飛遙望燕雲在何處一聲長嘯倍依依

祇緣慕富故嫌貧勞燕分飛怨老親昔日良緣成幻夢徒從畫上喚眞眞

自題探花杏苑圖

丹徒楊鴻年秋心

不怪癡郎心欲傷可憐花落美人亡昔年早嫁應歡喜今日遲探已渺茫詎料紅綃墮地易空教紫燕入園忙阿儂本是阮家壻怕看文姬圖一張

題探花杏苑圖

無錫強光治化誠

撩人春色惹心傷舊事徵題爲悼亡繡幕朱欄問消息衣香鬢影

嘆微茫勸耕此日蘇髯老買醉當年阮屐忙雲想玉容花想淚詩成誰復錦機張

又

秦縣孫同德馨儒

斯圖重撫便神傷祇是人亡物未亡回憶尙書情脈脈偏教處士嘆茫茫那堪此日吟詩慘轉悔當年繪事忙滿紙紅英皆淚點每逢紀念忍懸張

又

奉賢朱家駒遜叟

杏苑探花事可傷春明落第覺羅亡多情不棄君相契老眼堪憐我已茫一幅丹青餘感慨百年伉儷太匆忙同床各夢題詩者要攫斯圖素壁張

又

丹陽荆鳳岡石梧

竟同奉倩說神傷追念傾城璧已亡滿苑落花情耿耿重泉宿草

訊茫茫崔徽易觸披圖咸
燕結空教入夢忙如此丹青如此樹安
仁寫禿紙千張

又

長洲黃鈞顯堯

安仁作賦最心傷倩影依稀幸未亡
庭院風殘春寂寂蓬萊水淺信茫茫
生憎結隊黃鸝啼鬧冷笑穿簾紫燕忙
滿地落英如碎錦拈來試問畫眉張

又

武進諸懿德秉彝

怪他奉倩太神傷餘痛難消賦悼亡
嫁杏有緣稱藉藉影梅無故感茫茫
枉教綵縷留春住空繫金鈴入夜忙
底事隔牆蜂蝶過招魂怕剪紙千張

又

長洲張榮培蟄公

春歸上苑黯神傷一卷新詩爲補亡
杜宇叫殘花寂寂蓬山隔斷

路茫茫劇憐燕子尋巢苦不見鶯兒織錦忙收拾東風紅十里更誰門第訪金張

又

青浦徐公修慎侯

古來秋士易悲傷况復連番賦悼亡茂苑春殘神悵悵曲江路隔恨茫茫心香罷爇空房冷肩史追修綵筆忙人面桃花渺何處生塵遺掛壁間張

又

高郵楊蔚蒼亭

桑田滄海實堪傷况復良朋賦悼亡此後光陰真了了從來天道本茫茫鮫綃有淚和愁織蜨夢尋香爲底忙幽恨綿綿難解却改絃安肯復更張

又

吳縣陸受昌聞善

安仁何必把懷傷自古紅顏最易亡惟祝前程堪遠大休嗟後顧

是蒼茫知君有感推敲苦愧我無才吟詠忙漏盡燈殘猶未就阿儂那敢比蘇張

又

高郵楊遵路 璧漁

鸞絃崩折最增傷未老潘郎賦悼亡春意銷沉心悵悵雨聲淒咽夢茫茫一枝難遣鵲啼苦十里空思鳥逐忙太息花殘人不壽那堪重見畫圖張

又

常熟蔣祖堔 瘦石

鸞絃中斷劇堪傷花落花開人已亡石爛海枯心耿耿天長地久恨茫茫十年往事思量遍一紙哀音唱和忙杏苑探花聊寄意畫圖珍重壁間張

又

奉賢朱聲韶 伯庸

問君何事尙悲傷舊恨今休說悼亡半百韶華過易易大千世界

亦茫茫畫中人嘆經年別課外詩敲盡日忙消息江南春又到頻將笑口對梅張

又

歙縣汪定執允中

同爲奉倩慣神傷共作安仁兩悼亡深巷無聲春寂寂小樓聽雨恨茫茫輪君尙擁衾綢暖老我難隨鶯燕忙忍效鰥魚常守夜苦吟何止紙千張

又

吳縣張炳翔叔鵬

杏花仙子已歸真今植花開不見人欲認花容花又落荀郎未免黯傷神

昔日探花得意呼今朝翻作悼亡圖落花時節驚心處點點殘紅滿地鋪

題悲秋館憶語

南平陳守治瘦愚

編成憶語署悲秋似子多情孰與儔舉案夙聞誇德耀鼓盆不忍
學莊周佳人身已歸黃土名士緣難到白頭舊日畫眉京兆筆寫
來一字一綢繆

又調寄長相思

孝義張旆建亭

思悠悠恨悠悠寫到傷心字字愁涔涔淚欲流莫悲秋莫吟秋
恨事多從筆底收今生愿未酬

題惜春館遺稿

前調

孝義張旆建亭

德無倫貌無倫巾幗羣推第一人風流著作身志難伸氣難伸
三十華年遽出塵偏如楊太真

題殤曇錄

奉賢朱家驊粥叟

明德之後必有達而况君爲大孝人五桂八龍看轉瞬年年誕降
石麒麟

又

吳縣陳慶楣霞門

三殤令嗣實辛酸莫怪先生淚不乾
伯道無兒天欲補祝君他日子承歡

又

南匯朱惟恭太忙

珠沉璋缺不爲虧百日嬖昵萬首詩誰謂家門如伯道名流管底有君兒
一編曾示浦江東近事金山惜石公慧並昭明存憶語十齡還似十旬空
隨園晚獲似商瞿四十無男詎足虞他日玉環能再世逋翁血淚始知愚
不休不臥謝招邀勞我書城白日消幸得新孩原可喜閒來提抱免無聊

又

桂子竟長逝讀君詩四篇兩間殤亦壽百歲日爲年東野吟相答
昌黎序亦然雙聲剛倚罷珠淚各漣漣

題殤曇補錄

奉賢朱家駒 遜叟

近者高吹萬殤曇也著文惟君吟一再和客藻紛紛西笑參新偈
南華證舊聞纓簪同慰藉卜夏晒離羣

題殤曇續錄

奉賢朱家駒 遜叟

荷郎隨萎化悲結再成三玉露驚徂暑金仙苦現曇卞和同泣璞
彌勒更修龕隔歲庚申紀占熊消息參

生子不舉賦詩誌悼索 遜叟先生和

丹徒楊鴻年 秋心

我亦前朝喪小兒當時曾賦斷腸詞豈無同病相憐者但望先生

賜和詩

秋心生子不舉賦詩誌悼奉次元勻慰之

奉賢朱家駒 遜叟

瑤環文祿稱家兒湯餅歡徵屬和詞那便曇花同一現殤兒又見案頭詩

我正淒涼失壯兒霜凋夏綠慘題詞含悲珍重還君祝熊夢徵祥速賦詩

追悼四兒

丹徒楊鴻年 秋心

本來有意踏蓮花詎料無端落桂華同病相憐感朱氏連番不育痛楊家去年雖說難留果今歲惟期再結瓜倘使弘農產雛鶴勝于永叔夢虺蛇

慰秋心喪子

奉賢朱家駒 遜叟

清辭如噉晚秋瓜舊夢依稀尙憶蛇累我苦吟三易稿敬君積善
四知家終看玉樹傳黃卷正侍金萱誦白華應念病餘還門韻詩
成飛落硯池花

又

無爲何雋樂生

無端命運厄龍蛇不料驕陽忽萎瓜玉燕投來依爾膝金環探得
返誰家宜男後茂青如草有女今生豔若花預祝三多非謊語勸
君還是惜韶華

和秋心哭三女梅華勻

無爲梅伯榮

蝴蝶含愁怨落花無情風雨損春華幼知閨內常依母閒在園中
學種瓜撒手蓋棺能瞑目辭親去世不歸家可憐堂上腸真斷從
此人間怕咏蛇

自題曇花吟後

丹徒楊鴻年秋心

昔日曾經折桂花今朝又是落梅華吟詩哭女同元氏作賦傷兒
似庾家東野無端竟殤杏青門有意欲栽瓜他時小妾如分婉定
夢熊羆不夢蛇

嘆鳳傷麟集跋

辛酉仲冬中浣余有答奉賢朱粥叟先生詩云自問平生爲薄命
若非嘆鳳便傷麟蓋紀實也余爲先室朱嘯雲佩英兩女士已刻
憶雲望杏錄四知堂悼亡集悲秋館憶語三種爲亡兒桂生荷生
兩人已刻殤曇錄補錄續錄三種而海內諸大吟壇尙有賜我佳
章眞可感也茲付手民刊之名曰嘆鳳傷麟集猶錫山強氏所編
小競齋唱酬淚墨南平陳氏所編燈前淚影詩鈔耳昔唐明皇謁
孔廟詩云嘆鳳嗟身否傷麟怨道窮如余喪雙親兩婦四子一女
非較孔子爲尤甚耶然則余身旣否道旣窮不得不嘆鳳而傷麟

矣質之方家以爲然否是爲跋

癸酉孟秋中浣丹徒楊鴻年秋心撰于吳門悲秋館

